

وارلیق

VARLIQ

Dil, Ədəbiyyat, Mədəniyyət və Cəmiyyət Araşdırmaları Dergisi

Dil, Edebiyat ve Toplum Araştırmaları Dergisi

Journal of Language, Literature, Culture and Social Studies

İkinci Dönem. Sayı: 2021: 26(4), ss. 7-8

Telif Haqqı@Varlıq Dergisi

سونوش

• دوکتور محمد رضا هیئت

دگرلی آراشدیرماجیلار، سئوگیلی اوخوجولار؛

۲۰۲۱-جی ایلین دوردونجوسو سایسی، ایکینجی دؤنمین ایسه ۲۶-جی سایسی ایله قارشینیزداییق.

درگیمیزین بو سایسیندا چئشیدلی قونولاردا ۵ بیلیمسل مقاله یه یئر وئرلمیشدیر.

دوکتور بابک شاهد «شعوبیه حرکتی نین اورتایا چیخیشی و فیکری تمللری» باشلیقلی یازیسیندا گونوموز فارس میلّیتچیلیگی نین تملینی اولوشدوران و ان اؤنملی قاینای اولان شعوبیه حرکتی نین ادبیاتدا اولدوغو قدر سیاسی-توپلومسال آلانلاردا دا بوراخدیغی گنیش ائتکیلرینی و اونون اورتایا چیخیشینی اینجه له میش، بو ساحه ده ایندییه قدر آپاریلان آراشدیرمالار حاقیندا مارقلی بیلگیلر وئرمیشدیر.

درگیمیزین اؤنجه کی ساییلاریندا دا آذربایجان سول حرکتینی چئشیدلی بویوتلاردان اینجه له یین جلیل یعقوبزاده، بو ساییدا قلمه آلدیغی «آذربایجان سول حرکتینده فرقلی بیر باخیش آچیسى: سول تمايوللو تورکچولوک» باشلیقلی مقاله سینده آذربایجان سول حرکتی نین ایچینده تورکچولوک آخیمی نین باشلاما سببلری، بو آخیمین اؤنده گلن شخصیتلری و اونلارین فعالیتلرینی آراشدیراراق، دگرلی بیر چالیشما اورتایا قویموشدور.

عباس شادمند «آذربایجانلی اوستا و معمارلارین آنادولو تورک صنعتینه قاتغیلاری» آدلی مقاله سینده، آذربایجان معمارلیغیندا اؤنملی بیر یئر صاحیب اولان و گؤرکملی اثرلر یارادان آذربایجانلی معمارلار و صنعتچیلرین آنادولودا دا بؤیوک اثرلره امضا آتدیقلارینی، یا دا بو اثرلرین

تیکیلمه سینده دقته دگر قاتغیلاردا بولوندوقلارینی آیرینتیلی بیر شکیلده اله آلاق، بو آنداکی اؤنملی بیر بوشلوغو دولدورماغا چالیشمیشدیر.

قاشقای تورکلری اوزرینده دگرلی چالیشمالاری اولان عماد حضرتی نین «چاغداش قاشقایی ادبیاتیندا قاراباغ» آدلی مقاله سینده، جوغرافی باخیمدان مسافه لی اولماسینا باخمایارق، قاشقای تورکلری نین آذربایجانا اولان سئوگی و باغلیلیغی نین، اؤزلیکله ده قاراباغ ین ایشغالی و قورتولوشونون ادبیاتا یانسیمالاری اؤرنکلری ایله اینجه لنمیشدیر.

محمد تکدوغان «دئوریم سونراسی گونئی آذربایجان تورکلرینه یؤنه لیک اقتصادی و کولتورل پروپاگاندا لار» آدلی چالیشماسیندا، ۱۹۷۹ (۱۳۵۷) دئوریمیندن سونرا ایران دؤلتی نین سیستماتیک و بیلینجلی بیر شکیلده آذربایجان تورکلری علیه نه آپاردیغی اقتصادی و کولتورل تبلیغاتلاری اینجه له میش و آنالیز ائتمیشدیر ■